

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HAZRAT MUHYI-UD-DIN AL-KHALIFATULLAH

Munir Ahmad Azim

30 Octobre 2015 ~
(16 Muharram 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause brièvement lors so récent visite dans Comores (kot li ti fer le Khutba Jummah là-bas semaine dernière) et l'Île de la Réunion et après li fine contigne troisième partie de so Khutba lors « Khidmat-e-Khalq »:

Par la grâce d'Allah mo contigne azordi lor le même sujet de mo Khutba ki mo ti commencer trois semaines avant (09 & 16 Octobre 2015) et azordi c'est 3^{ème} partie de mo Khutba lors « Khidmat-e-Khalq ».

Donc, nous capave réfléchi boucou lors là, ki qualité société, nous Aka Hazrat Muhammad (saw) fine crée et fine soigner et fine établi. Dans bane tipti conseils nous capave gagne ene l'idée de sa. À propos de sa, d'après bane Hadiths, Hazrat Muhammad (saw) fine cause d'ene sujet très important, c'est-à-dire, ki bizin prend grand soin de bane voisins. Li (saw) fine dire ki aucaine dimoune, surtout bane madames pas bizin guette zot voisins/ voisines comme pli bas. Ene madame (musulmane) bizin établi connexion avec so voisine, même si li à travers ene la patte cabri ki li donne so voisine en cadeau.

Sa c'est ene conseil bien pure ki nous prophète (saw) fine donne nous et li ena ene éloquence extraordinaire. Li dire pas considère bane voisin comme pli bas ki ou. Ici, li veut dire ki si ou donne bane cadeaux à ou bane voisins, surtout voisin ki pli proche de ou la caze, bé li ene zaffaire ki honore li. Si ou pas donne li cadeau, bé li veut dire ki dans ou lizié li péna aucaine valeur. Et généralement bane humain ena sa tendance là, ki zot donne bane cadeau à bane ki même rang are zot, ou sois à bane ki pli supérieur ki zot, et zot oublier bane ki pli tipti ou ki pas ena assez les moyens (financier) ki zot. Et sa li commencer au pli petit niveau et li continuer aller lors le pli haute niveau. Et dans relation de bane humains, ena sa zaffaire d'échanges de

cadeaux là. Et généralement zot fréquente bane cercles de zot propre rang ou bane ki pli supérieur ki zot. Mais Quran fine donne ene conseil très important contre sa.

Quran dire ki kan pou la cause d'Allah ou dépense quelque chose, bé mazine bien ki faudré pas li reste circuler entre ou même. Ou bizin descende pli bas ki ou. Si ou pé faire sa pou la cause d'Allah, bé guette tous bane créatures Allah pareil, sinon sa bane *Néki (bon actions)* ki ou pé faire par l'apparence avec ou bane proches ou sois ou bane voisins, couma bane présentation de bane cadeaux etc. alle dans vide. À ce moment là, li pou vine ene zaffaire ki plaire à ou propre nafs, à ou propre être et non pas à Allah.

Couma Allah dire dans Quran :

« Et zot ti donne à manger, pour l'amour d'Allah, à banes pauvres, banes orphelins et banes prisonniers, (en disant) : 'Nous donne ou manger, pour simplement trouve figure d'Allah. Nous pas cherche de ou aucaine récompense ni aucaine remerciement.' » (Al-Insaan 76: 9-10)

Verset Quran ki mo fine réciter devant ou là, Allah (swt) dire ki : « Bane dimounes ki donne manger aux autres pour la cause d'Allah, zot ena deux qualités dans zot. Ene c'est ki par l'amour pou Allah ki zot donne à manger, et 2^{ème} c'est ki kan zot même zot content la nourriture, kan zot même zot dans le besoin, kan zot même zot faim, mais malgré tout sa là zot dépense pou la cause d'Allah. En fait sa deux significations là zoine pou vine ene seul. Parceki ene dimoune li faire sacrifice seulement kan li ena l'amour pou quelque chose. Sinon sa sacrifice là, pas pou dire nannié pou li.

Donc, la conception de sacrifice même li fausse sans ki ena l'amour. Bane mamans faire sacrifice pou zot bane zenfants parceki zot ena l'amour pou sa bane zenfants là. Ene dimoune li faire sacrifice pou so amoureux, parceki li ena l'amour pou li. Donc, le sacrifice ena ene lien profond avec *Mohabbat* (l'amour). Alors kan Allah fine mentionner ki c'est kan ou ena l'amour pou Allah ki ou faire sa, c'est vraiment c'est parski ou ena l'amour pou Allah ki ou faire sa. C'est-à-dire ene l'amour gagne le dessus lors ene lotte l'amour. Et pou la cause de l'amour pou Allah ou laisse passe ou l'amour pou ene kitchose matériel. C'est-à-dire, ou sacrifier ou l'amour pour bane choses mondaines et donne préférence ou l'amour pou Allah. Et ene preuve de sa, c'est ki kan bane dimounes là vine remercier ou, bé tout d'un coup ou choquer par sa et ou gagne la peine par sa. Ou penser ki attention ki ou bane *Néki* (bon actions) ki ou fine faire là, alle dans de l'eau. Ou penser ki ou pas digne pou recevoir sa bane remerciements là, et ou recherche seulement la satisfaction et le plaisir Allah parceki ou priorité c'est Li (Allah), pou ki Li content avec ou, pas dimounes. Si dimounes reconnaissant et remercier ou, sa pas fer ou gonfler d'orgueil et de satisfaction, mais plutôt ou peur ki par sa, attention ou bane actions alle dans vide.

Sa verset Quran là dire couma sa bane kalité *Muttaquun* (bane dimounes ki ena la crainte d'Allah) là zot dire à sa bane dimounes ki zot aider pour la cause et l'amour d'Allah : « *Nous fine dépenser lors ou pou la cause d'Allah. Alors pas penser même si pas bizin remercier nous, ou sois donne nous de récompense etc. Nous fine gagne nous récompense are Celui pou laquelle nous ti fine faire sa action là.* »

Alors, sa sujet là li bien profond, parski ena ene lotte chemin ki ouvert pli devant, sa c'est ki important kan ou servi l'humanité et ou servi li pou la cause d'Allah. Et ou dire zot ki : « *Nous, nous pas pé faire aucaine faveur lors ou. C'est Allah ki pé faire faveur lors ou aussi et alors nous aussi.* » Ena sa message là ki inclu dans lotte partie de sa verset là, kot c'est *Ehsaan* de celui pou laquelle nous fine faire sa là. Et c'est pas nous *Ehsaan* sa. Li ene très grand sujet pou établi zot connexion avec Allah.

Si bane dimounes arriver comprend ki celui ki pé faire bon actions là, bon traitement avec li là, c'est pas so *Ehsaan* sa, mais c'est *Ehsaan* de celui pou laquelle li pé faire sa. Bé à ce moment là bane dimounes là, zot l'attention pou diriger vers Allah. Li pareil couma dire ene servante pé alle donne ene mendiant quelque chose. À ce moment là mendiant là commence remercier servante là et commence donne li *doahs* etc. Bé lirlà servante là pou dire, « *Non, non pas moi sa, c'est madame de la maison ki fine donne moi pou donne ou sa. Moi mo pas pé donne nannié. Mais c'est mo maitre ki fine dire moi ki kan ene pauvre vini donne li quelque chose, pas laisse li retourne la main vide.* » Kan servante là pou dire sa, bé toute suite l'attention de mendiant là pou alle lors maitre de la maison là. Et c'est sa même sujet ki verset Quran là pé explique nous, c'est-à-dire, ki tout le message li finalement attacher à Allah le Maître de l'univers.

Et avec sa nous gagne boucou des connaissances concernant le sujet de *Tarbiyyat*. Hazrat Muhammad (saw) fine donne sa même l'enseignement là et tout céki fine passer là, c'est le résultat de bane profonds connaissances du Quran ki le Saint Prophète (saw) ti ena et li fine donne nous bane conseils bien pure et bien intéressant en forme de Hadiths, et c'est à travers sa bane zaffaires là même, ki sa révolution là ena lieu.

Pou ene dimoune ordinaire, si li zis guette le Quran, li pas suffit aussi longtemps ki li pas guette Quran d'ene œil d'ene dimoune ki ena la connaissance d'Allah, ene proche d'Allah. Et celui ki ti possède plisse connaissance de Quran, c'était Hazrat Muhammad (saw). C'est pourquoi pou ki ou capave profite de bane Hadiths ou bizin lier li avec bane sujets de Quran et à ce moment là pou ena ene nouveau sujet ki pou émerger devant ou. Ou pou trouve ene nouveau monde de signification.

Donc, c'est dans l'exemple de Hazrat Muhammad (saw) même ki ou pou trouve bane solutions couma pou ki pou redresse ene la caze et raffermir bane relations entre papa et zenfant, maman et zenfant, entre le mari et la femme, bé lirlà zot gagne sa bane bénéfiques là en

suivants l'exemple du prophète (saw). Sa li pas pou reste limiter dans la caze tout seul. Non. Le Prophète (saw) ti ene '*Rahmat-ul-Aalameen*'. Sa bane bienfaits là, bénéfiques là pou sorti en dehors la caze, et li bizin rentre dans bane la caze à coté et en fait le sujet de droit de bane voisins aussi li très important. Pour faire le *tabligh*, bé li commence avec le voyage en accomplissant droit de bane voisins.

Et mazine sa bien, ki si zis sak, sak fois faire le *Salaam* à bane voisins et continuer tini conversation are zot, rentrer dans zot la vie privé (couma dire Missié Jean-Louis) veye zaffaires dimounes, espionner pou conne tous céki passer dans so la caze et rentre au fond dans zot la vie privée, sa bane zaffaires là pas pou profitable di tous pou ou. Au contraire li pou cause plisse di tort et en plisse ou pou commette ene grand péché. (Lire *Surah Al-Hujurat*).

Bizin donne bane conseils ki sa capave profitable, c'est ki ou envoie li quelque chose, et ensuite ou ré-envoie li encore. A tel point ki celui ki pé recevoir cadeau là, li pou rode conné ki sanlà pé envoie sa, ki sanlà pé capave pé faire ene traitement de *Ehsaan* are li coumsa, sak-sak fois ? Lerlà pas ou ki pou alle rode li, c'est li ki pou vine rode ou. Et de sa façon là, sa cadeau extérieur là pou changer en ene cadeau intérieur, lerlà non seulement ou pou donne li bane cadeau matériel mais ou pou aussi prépare so le cœur pou recevoir bane cadeau spirituel aussi.

Donc pou vine bane bon voisins aussi sa demande ene très grand morale. Et kan ou adopter sa morale là, ou capave sappé avec plusieurs bane mal. Et ou capave gagne boucou sorte de cadeaux spirituel, *Insha-Allah*. Ki Allah (swt) aide sakaine parmi ou, ouvert ou le cœur, illumine ou avec So connaissance pou ki sakaine d'entre zot comprend bien le sujet de mo Khutba Jummah, *Insha-Allah*. Mo faire boucou *doahs* avec Allah (swt) ki Li donne moi le *Ilm* (la connaissance) pou mo contigne le 4^{ème} partie de mo Khutba Jummah, vendredi prochain. *Insha-Allah, Ameen*.